

*colligitur varietas à priori.* Nam decreta Dei sunt simplicissimus actus intellectus & voluntatis Dei, quo ille iudicavit sapientissimè bonum esse aliquid extra se facere, præcipere, & permittere, illudque sanctissimè voluit.

*IV. Ex necessitate infallibilitatis, qua est respectu Dei, malè colligitur necessitas coactionis, aut etiam necessitas consequentis.* Nam omnia, tum necessaria, tum contingentia in naturâ suâ, sunt necessariò ex hypothese præscientiæ Dei, quæ falli non potest: at eadem fiunt vel necessariò, vel contingenter in causis suis; neutra coactè.

*V. A decreto Dei ad executionem, & vicissim ab executione ad decretum valet consequentia, quatenus executio est speculum decreti.* Nam quæ Deus ab æterno decrevit, illa exequitur in tempore, eomodo, quo decrevit: & quæ in tempore exequitur, illa ab æterno decrevit, eomodo, quo exequitur.

*VI. Ex distinctione modali decretorum Dei non licet colligere realem.* Teneatur hîc illud simile: Sicut infinitæ imagines in speculo non sunt res distinctæ in speculo, ita ut speculum ideò mutationem aut compositionem subeat: sic infinita decreta in Deo se habent.